

Transkript sa konferencije za medije međunarodnih organizacija

OHR, Oleg Milišić

OSCE, Aida Bešić

EUPM, Monja Koluder

EUFOR, Jem Thomas

OHR

Osnovni ustavni test: hoće li funkcionirati?

O predloženim ustavnim promjenama treba donijeti sud na osnovu toga da li će funkcionirati ili ne, izjavio je visoki predstavnik jutros na konferenciji koju je u Sarajevu organizirao OSCE, kojim trenutno predsjedava Slovenija.

«Reforme koje smo proveli u posljednjih nekoliko godina su donijele poboljšanja građanima BiH. Obim u kojem su ove reforme doprinijele tim poboljšanjima predstavlja ključni kriterij na osnovu kojih se o njima treba donijeti ocjena,» izjavio je visoki predstavnik. «Reforme koje trenutno provodimo kako bismo BiH povelj dalje na putu ka Evropi moraju se ocijeniti na isti način. A reforme o kojima se razgovaralo na konferencijama koje su održane u cilju obilježavanja desete godišnjice potpisivanja Daytonskog sporazuma- i o kojima su u velikoj mjeri razgovarali građani BiH među sobom te mediji – se isto tako moraju podvrgnuti ovom osnovnom testu.”

Visoki predstavnik je konstatirao da sa otpočinjanjem pregovora o stabilizaciji i pridruživanju BiH odlučno prelazi iz faze implementacije mira na veliki zadatak uspostavljanja funkcionalnih vlasti i dostignuća evropskih standarda u političkom i ekonomskom životu. “Zadatak međunarodne zajednice je bio da pomogne da se uspostave održive institucije, te da se postave unutar dosljednog zakonodavnog i praktičnog okvira – ali na građanima BiH je zadatak da učine da ove institucije funkcioniraju, te da unaprijede i ojačaju ovaj okvir,” rekao je visoki predstavnik.

“Ulaskom u sljedeću fazu, organi vlasti BiH su ti koji moraju donijeti relevantne odluke koje se tiču evropskih integracija, i oni to moraju samostalno uraditi.”

Međutim, visoki predstavnik je naglasio da ovo ne znači da će međunarodna zajednica okončati svoj angažman u BiH.

“Bosni i Hercegovini je još uvijek potrebna znatna pomoć, uključujući i pomoć onih zemalja koje nisu članice Evropske unije koje su joj pomogle na njenom putu oporavka tokom proteklih 10 godina. BiH je još uvijek potreban EUFOR. BiH predstavlja jedinstven slučaj, te, po mom mišljenju, zahtijeva i jedinstven odgovor i reakciju EU i cijele međunarodne zajednice. Moramo osmisliti pristup koji uzima u obzir da je BiH danas djelimično angažirana na stabilizaciji mira a djelimično na procesu pristupanja EU.”

Donio sam puni tekst obraćanja visokog predstavnika.

Odgovornost za proces ponovnog ujedinjenja Mostara će biti na gradskim vlastima

Visoki predstavnik će sutra posjetiti Mostar, gdje će se obratiti na ceremoniji obilježavanja formalnog završetka rada Jedinice za implementaciju statuta grada Mostara, nakon što je u velikoj mjeri okončala svoj mandat.

Preostale funkcije Jedinice za implementaciju statuta grada Mostara će se predati regionalnom uredu OHR-a (OHR-jug).

Okončanje rada ove Jedinice odražava širi proces na cijeloj teritoriji Bosne i Hercegovine, u kojem bh. institucije sistematski preuzimaju odgovornost za ključne reforme. Ovaj proces je ušao u novu, napredniju fazu sa otpočinjanjem pregovora o stabilizaciji i pridruživanju sa Evropskom unijom.

Pitanje je sada da li bh. političari – a u slučaju procesa ujedinjenja, posebno mostarski političari – mogu ispuniti ovaj

novi izazov na zadovoljavajući način. Od 30. novembra 2005.god. odgovornost za proces ujedinjenja Mostara će direktno biti na gradskim vlastima. U protekle dvije godine su se desile značajne i konstruktivne promjene u Gradu u smislu upravljanja, institucionalne reforme, održavanja i razvoja infrastrukture, razvoja poslovanja i općenito atmosfere u gradu. Ovaj pozitivni trend se mora održati.

Visoki predstavnik će također posjetiti Ministarstvo trgovine i turizma FBiH, gdje će se susresti sa ministrom gospodinom Maidom Ljubovićem. Ministarstvo trgovine je dalo pozitivan primjer poštujući ustavnu odredbu koja zahtijeva da se pet federalnih ministarstava presele u Mostar.

Objavit ćemo obavještenje za medije tokom dana sa svim detaljima vezanim za prisustvo medija tokom ove posjete.

OHR pozdravlja usvajanje savremenog zakona o sprečavanju i suzbijanju zloupotrebe opojnih droga

OHR pozdravlja jučerašnje usvajanje Zakona o sprečavanju i suzbijanju zloupotrebe opojnih droga od strane Doma naroda BiH. Zastupnički dom BiH je ovaj zakon usvojio 8. novembra.

Usvajanje ovog Zakona predstavlja značajno osavremenjenje zakonske regulative kojom se uređuje oblast kontroliranja opojnih droga.

Do jučer je BiH bila u nezavidnom položaju jer je bila jedina zemlja u Evropi koja nije ispunjavala međunarodne standarde u kontroli uvoza, proizvodnje i izvoza kontroliranih supstanci. BiH je počela postajati centar za proizvodnju i trgovinu kontroliranih supstanci. Bez efikasne zakonske regulative, za policiju i tužioce je postajalo nemoguće da na efikasan način riješe pitanje ilegalne proizvodnje ovih supstanci.

Ovo osavremenjenje znači da BiH ispunjava zahtjeve postavljene Konvencijama UN-a o kontroli opojnih droga te rješava zahtjeve iz Studije izvodljivosti Evropske komisije o rješavanju nelegalnih aktivnosti vezanih za droge.

Jasno je da je ovaj zakon potreban kako bi se riješio problem zloupotrebe droga u bh. društvu, ali ovaj zakon će učiniti jasnijim i posao angencija za provođenje zakona te pokazuje da je BiH partner u borbi čiji je cilj da se podrži vladavina zakona.

OSCE

Trodnevna konferencija pod nazivom „Dayton-10 godina poslije“ počinje danas u Sarajevu

Danas je u Sarajevu počela Konferencija posvećena desetogodišnjici potpisivanja Mirovnog sporazuma u Daytonu, koja će okupiti političare, vladine zvaničnike, naučnike i stručnjake iz različitih oblasti.

Domaćini ovog trodnevnog događaja, „Dayton – deset godina poslije: razriješenje konflikta i izgledi za saradnju“ su Univerziteti u Sarajevu i Primorska a podržan je od strane predsjedavajućeg misije OSCE-a i Misije OSCE-a u Bosni i Hercegovini.

Cilj konferencije je da napravi sveobuhvatnu procjenu istorijskih događaja koji su vodili potpisivanju Daytonskog mirovnog sporazuma, da obezbjedi analizu trenutne situacije, da razmotri probleme u vezi sa procesima integracije i dezintegracije, da osvjetli društvene, prostorne, geopolitičke i sigurnosne trendove, i ukaže na mogućnosti buduće saradnje u okviru šireg evropskog i globalnog konteksta.

Konferencija za novinare sa Predsjedavajućim OSCE-a, Ministrom za strane poslove Slovenije, Dimitrijem Rupelom, Rektorom Univerziteta Primorska, Prof. Lucija Cok, James O Brien, jednim od kreatora Daytonskog mirovnog sporazuma, je zakazana za danas u 13:15 u poslovnom centru UNITIC, Fra Andjela Zvizdovića 1, Sarajevo.

EUPM

Komesar Carty izražava sućut porodici poginulog pripadnika MUP USK-a

Jedan pripadnik Ministarstva unutrašnjih poslova Unsko-sanskog kantona jučer je tragično izgubio život prilikom operacije hapšenja, dok su dvojica njegovih kolega tom prilikom teško ranjena.

“U ime Policijske misije Evropske unije i u svoje lično ime želim izraziti duboku sućut porodici pripadnika MUP-a USK-a, koji je poginuo na dužnosti služeći svoju zemlju,” izjavio je komesar Carty.

“Naše su misli također i uz njegove kolege, kojima želimo brz oporavak” zaključio je komesar Carty.

Brigadni-general Vincenzo Coppola imenovan za novog šefa EUPM-a

Poličijska misija Evropske unije u Bosni i Hercegovini ima zadovoljstvo objaviti da je brigadni-general Vincenzo Coppola imenovan za novog šefa ove organizacije.

Jučerašnju odluku o njegovom imenovanju donio je Komitet za politiku i sigurnost EU, na prijedlog Generalnog sekretara za spoljnu politiku i sigurnost Havigera Solane. Odluka je uslijedila nakon objave usvajanja zajedničke akcije, kojom se omogućava nastavak misije EUPM-a u BiH od 1. januara 2006 do kraja 2007. godine.

Brigadni-general Coppola je između ostalog obavljao i dužnost glavnog policijskog savjetnika u Vijeću EU-e u Briselu (2001-2004) i bio u službi na Balkanu tokom misije SFOR-a u BiH (1998) kao i u misiji KFOR-a (1999-2000).

Brigadni general Coppola će zvanično preuzeti dužnost 1. januara 2006 godine od komesara Kevina Carty-ja, koji ovu dužnost obavlja od 1. marta 2004. godine.

U prilogu je biografija brigadnog generala Coppole.

EUFOR

Nije bilo izjava

Pitanja i odgovori:

Nevenko Erić, SRNA:

Pitanje za EUFOR. Imamo potvrđenu informaciju da je EUFOR pružio podršku akciji MUP-a na hapšenju Mirka Šarovića i Govedarice, to su bivši funkcioneri iz Republike Srpske koji su danas uhapšeni po nalogu Suda BiH. Također imamo informaciju da je Milan Bjelica, koji je također trebao da bude uhapšen po nalogu suda, u bjekstvu. Možete li potvrditi informaciju? A za OHR, komentar na to današnje hapšenje?

EUFOR:

To što mogu reći je da je na zahtjev Državnog tužitelja BiH, EUFOR jutros pružio podršku pripadnicima SIPA-e u akciji hapšenja određenih pojedinaca. Ovu akciju je vodila i izvršila SIPA uz taktičku podršku EUFOR-ove integrisane policijske jedinice «Carabieneri». EUFOR je djelovao unutar svog mandata kako bi pružio podršku lokalnim BiH vlastima. Bilo kakvi sudski postupci u ovom slučaju će biti u domenu Ureda državnog tužitelja i BiH vlasti, i neće biti u domenu EUFOR-a, te EUFOR neće dalje špekulirati o ovom pitanju. Prema tome, sva druga pitanja koja imate u vezi ove akcije i hapšenja trebate uputiti SIPA-i ili Uredu državnog tužitelja. Hvala vam.

OHR:

Što se tiče OHR-a veoma jednostavno, kao što znate, poštujući neovisnost i nadležnosti Suda i Tužitelja, Ured visokog predstavnika nikada ne komentira ovakve slučajeve.

Nevenko Erić, SRNA:

Može li za OHR još jedno pitanje? I pored preporuke OHR-a Komisija za državnu imovinu u ponedjeljak nije izuzela zemljište za izgradnju pritvorske jedinice iz Odluke Visokog predstavnika o privremenoj zabrani. Možete li to komentirati?

OHR:

Dobili smo informaciju da jučer nije došlo do traženih pomaka. Trenutno razmatramo situaciju, ali u suštini naši zahtjevi se nisu uopšte promijenili.

Branka Kusmuk, RTRS:

Za Kancelariju Visokog predstavnika, ja sam Branka Kusmuk, RTRS. Drago nam je da OHR pozdravlja usvajanje Zakona o suzbijanju zloupotrebe narkotika, znači što se desilo jučer. Ali bi nam bilo draže da nam kažete nešto više i o jučerašnjoj Odluci o aboliciji ljudi koje je OHR smijenio prije izvjesnog vremena, pola godine, godinu. Možete li nam bar reći brojno stanje ili više detalja, bilo kakvih?

OHR:

Kao što smo mi objašnjavali jučer, odluka se odnosi na specifične slučajeve ljudi koji su uz Odluku o smijeni dobili i stavku da im je zabranjen dalji rad u javnim institucijama. Ta se Odluka odnosi na njih pojedinačno, nećemo ulaziti u specifične slučajeve. Odluka je više generalne prirode. Tako da neki dalji detalji o pojedincima nećemo davati.

Branka Kusmuk, RTRS:

Možete li bar reći koliko je takvih ljudi?

OHR:

Sve zavisi od pojedinca do pojedinca. I opet teško je sada reći u ovom momentu koliko će se ljudi sada opet naći u javnoj službi jer opet oni se moraju verificirati kao i svaki drugi. Tako da to više i nije odluka za OHR i kada bi vam ja dao broj to ne bi puno značilo u ovom momentu.

Branka Kusmuk, RTRS:

Da li ste bar obavijestili te ljudi na koje se Odluka odnosi?

OHR:

Odluka je javna. Oni su u poziciji da sada provjere i svoju Odluku o smijeni i na taj način provjeriti točno koja je situacija u njihovom specifičnom slučaju sada.

Nedim Dervišbegović, Reuters:

Pitanje sa druge strane. Koliko ljudi ima pravo da se prijavi na konkurs?

OHR:

Ja mislim da sam već odgovorio na to.

Nedim Dervišbegović, Reuters:

Pa ne. Niste.

Novinar #4:

Na koliko se odluka dosadašnjih odnosi ta Odluka. Koji je broj? Koliko ih je?

OHR:

Koji je broj...

Novinar #4:

Pa ako ih je smijenio dvjesto, recimo sto ih smijenio zbog saradnje sa ratnim zločincima i nesaradnje sa ICTY nego zbog kriminala. Koliko je takvih koji se mogu prijaviti? Znate li? Niste ih brojali?

OHR:

Kao što sam rekao ja neću ulaziti ovdje u brojeve. To se odnosi na pojedinačne slučajeve, i oni mogu... Svaki pojedinac može da provjeri svoju Odluku o smijeni koje su javne, tako da možete i vi slobodno pogledati na Internetu. I u svakoj Odluci stoje specifičnosti o toj smijeni. Što znači vi ste apsolutno u mogućnosti da pogledate i Odluke o smjenama kao i Odluku jučer i da napravite jedan pregled ukoliko vas to interesuje.

Ja sam rekao da neću ulaziti u detalje, pojedinačne.